



UNIVERSITÄTS-
BIBLIOTHEK
PADERBORN

Universitätsbibliothek Paderborn

Ein Widerruf vom Fegefeuer

Luther, Martin

Wittemberg, 1530

VD16 L 7544

Die ander lügen.

urn:nbn:de:hbz:466:1-33177

Die ander lügen.

Ob gleich Judas / solch opffer hette zu seiner zeit im alten Testament gethan / wie komen wir da zu / das wirs auch hinach thun müssen? Wollen wir zu rücke vnd widder zu Juden werden? Wer hat vns die gewalt gegeben / das man aus eines menschen (er sey gleich heilig) werck / ein Exempel / ia ein gebot vnd Artickel des glaubens mache / daruber man ketzer verbrennet? Ist das nicht zu hoch Gott versucht / vnd vber Gott gefaren mit vnerhoreter vermessenheit? Sagt doch dieser Text nicht / das mans hinach thun müsse odder solle / odder das Gott befolhen habe / sondern sagt allein daher ein geschicht / was Judas habe gethan fur sich selbs / vnd wir faren ein hin / machen flugs ein gebot vnd Artickel draus / aus eigener thurst / freuel vnd mutwillen / das vns Gott nicht befolhen / sondern verboten hat.

Also theten die Juden vorzeiten auch / da sie inn Genesi funden / wie Gott Abraham befalh seinen son Isaac zu opffern / harreten sie nicht / bis das ihn Gott auch solchs gepotte / furen zu / wie die vnfinnigen / machten flugs ein Exempel / gebot vnd Artickel draus / opfferten ihre sone vnd tochter / bis sie das land vol bluts machten / vnd erwurgeten dazu alle Propheten / die solchs straffeten vnd wehreten / gleich wie itzt die rasenden blut hunde auch thun / vnd vmb ssegfers willen die vnschuldigen

B digen

digen tödten/so sie doch kein Gottes wort für sich
haben/vnd dazu diesen Text felschlich furen/vnd
noch das Exempel Juda (das sie fürwenden) nicht
haben/vnd wens gleich ein Exempel were/den-
noch nicht gnug zum gebot odder artickel were.

Es ist aber der rechte Mänzerisch geist/des
Dialectica vnd Theologia war hierin auch gantz
Sophistisch/Denn/so leret er/David/Gedeon/
Josua vnd der gleichen/haben die Gottlosen Kö-
nige erschlagen/vnd wol dran gethan/vnd sind
von Gott gelobet/Drümb so wollen vnd sollen
wir auch die fürsten todschlahen/eben diesem Ex-
empel nach/wie diese lügner leren/Judas hat für
die todten geopffert/drümb sollen wirs Christen
auch thun. Vnd ist dazu vngewis/ob Judas hie-
mit für Gott/recht gethan hat odder nicht/weil
das gantze buch vngewis/vnd von den alten ver-
worffen ist/Aber die xij. tausent Drachmas/hab-
ben das hertze leid/machen Artikel vnd gebot/
wie sie wollen.

Es ist la nichts schedlichers inn der welt/
denn wo man/auch der heiligen werck/on Gottes
befelh/zum Exempel/ gebot/ lere vnd Artickel setzt.
Denn wir sollen keinem Exempel folgen/da sie ein
sonderlichen befelh gehabt/den wir nicht hab-
ben/Wir haben vnsern befelh für vns/als glauben/
lieben/dabey sollen wir alle gleich bleiben/sagt S.
Paulus Phil. 3. bis er vns etwas weiters heisse/wie
er ihenen gethan hat/Weil wir nu kein wort noch
befehl von

befehl von Gott haben / das fegefeuer zu glauben / so
ists eine verfluchte lesterung vnd lügen / durch vns
selbs / ein gebot vnd Artikel daraus zumachen / vnd
wens eitel heiligen Exempel schneyet vnd regente /
Watts Judas gethan / aus eigener andacht / so ste-
he es auff ihm / Er ist vnser Gott noch lerer nicht.
Gedeon richtet auch aus eigener andacht ein Ephod
an / aber gieng drüber zu scheitern / vnd wer weis /
ob Judas auch vmb dieser eigener andacht willen /
hernach so fallen vnd erschlagen werden must / Es
ist / on Gottes wort / nicht zu schertzen / mit men-
schen werck vnd der heiligen Exempel.

Die dritte lügen.

Ist die aller feinste / Judas selbs / von dem
dieser Text sagt / hat nicht geglaubt / das ein fege-
feuer sey / hats auch nicht können glauben / Denn es
ist im alten Testament kein fegefeuer gewesen / auch
nicht im newen Testament / zur zeit der Apostel vnd
lang hernach / Vñ die Sophisten sagen selbs / das
im alten Testament sey keins gewesen / Sind mir das
nu nicht feine trewe hirten vñ lerer / die einen fremb-
den Text (ausser der heiligen schrift) ein furen / den
sie selbs wissen vnd bekennen müssen / das er nicht
vom fegefeuer redet noch reden kan / dennoch aus
eigner thurst vnd freuel / mit mutwilligem liegen vñ
triegen / deuten vnd zwingen das fegefeuer zubesetzi-
gen / also rasend vnd vn Sinnig / das sie solche ihre
wissentliche lügen auch zum Artikel des glaubens
setzen / vñ die leute morden / die solche offenberliche
wissentliche lügen nicht als Gottes wort anbeten.

B ij Deist